

四庫全書

集部

欽定四庫全書

集部

敬業堂詩集卷三十三

詳校官左中允臣瑋五珠

助教_臣常循覆勘

總校官庶吉士_臣倉聖脉

校對官中書_臣雷純

謄錄監生_臣俞昌言

欽定四庫全書

敬業堂詩集卷三十三

翰林院編修查慎行撰

甘雨集

起丙戌五月盡九月

入夏以來畿輔稍旱自五月二十一日

駕發西苑大雨五晝夜田疇霑足萬口歡呼咸謂

聖天子軫念民生甘霖應期不禱而自至視靈雨甫田

諸什不既多事哉臣以珥筆隨豹車之後沐膏澤

而咏豐年固其職也

五月二十四日

駐蹕密雲連夕大雨

輦路涼生暑乍融到來連夜雨兼風
四山雷轉車聲外萬帳燈浮水氣中
入夢似聞泥滑滑占晴行見黍芄芄
頻年旼筆慙無補枕上吟成願歲豐

謝

賜普洱茶

洗盡炎州草木烟製成貢茗味芳鮮筠籠蠟紙封初啟
鳳餅龍團樣並圓

賜出儼分甌面月淪時先試道旁泉侍臣豈有相如渴
長是身依漉露邊

喀喇火屯口占

水無蚊蚋地無蝻寺有幡幢石有龕山是膏腴溪是乳
草如桑葉馬如蠶

蔣酉君同年為余寫芙蓉折葦扇頭小景戲題

二絕

偶拈秃筆寫霜容，
點綴誰知不取濃。
會得江湖清氣味，
蒹葭只合倚芙蓉。

塞垣歸思入秋多，
欲涉江湖奈晚何。
一葦可抗吾亦去，
詩翁莫嘆葉沈波。

七月朔烏城立秋

行宮六月全無暑，
早覺涼生大火中。
客裏心情原草草，
老來光景又匆匆。
千山朔氣初迎雁，
一雨秋聲盡入蟲。

笑指伊蘇河畔柳三年與爾共西風

七月十五日四更發熱河度嶺至喀喇火屯天

未明

塞天暑亦涼矧此秋候變披衣起我早熟路馬重踐羣
峯競高低孤月遞隱現參差樹交影斷續雲流片長風
從西來過耳劇嚙箭行行得平地星火遙可辨嵐霧滄
然蒸橫前鋪白練道旁有雙塔隔手不復見礪絕賴橋
通泉鳴知徑轉忽聽一聲鐘微茫識

行殿

口外無佛老之宮惟烏城行宮旁新創穹覽寺琳霄觀

七月十六日烏城直廬驚聞房師虞山公訃音

哀情痛切托於短章四首

公去京華日余方扈從時

癸未秋先生奉太夫人乞假南還余時方隨駕口外

三年歸失約一別見無期昨寄書猶達

前月接冢弟德尹揚州信云端

陽前與先生同波江

初傳病尚疑何當聞訃後驚發早秋悲

涑水攜書局蓬山入選樓

去春奉旨於揚州校刊全唐詩

奉親

恩最渥給俸禮仍優

在籍官恩準開俸從來無此例也

風格詩篇著儀

容畫像留

先生出都時留秋帆畫卷命題後復奉手書命慎行投閱歷年詩集

到頭天莫

問公自有千秋

壯歲官情澹懷歸至性真科名無媿色

庚辰殿試公第一人及第

巖壑早收身穉子將周晬高堂正六旬懸知方易箒俯

仰劇傷神

歷憶追隨地多慙屬望情早曾同座主

癸酉鄉試慎行與先生同出清

漢徐公廬陵彭公之門

老及作門生寢哭知何日心喪痛失聲灑

河兼淚雨滴滴向南傾

題酒君為家少詹姪畫四時花卉卷二首

乍驚五色江郎筆
幻出黃筌四季花
知是餘波多綺麗
未妨遊戲亦名家

吹開吹謝自年年
人世風災絕可憐
一片丹青非色界

四禪天是養花天

佛書有初禪二禪三禪四禪天至四禪天始無風災

座主總憲吳公請假旋里恭賦四律寄送

乞歸偏在

眷深時臺望非公更屬誰
岳峙淵渟瞻氣象
蒼松白石

表襟期久持綱紀羣僚肅獨抱冰霜

聖主知真喜太平多盛事大臣進退總凌施

法耀文星並一垣高從河漢溯淵源回瀾力比鈞衡重
下士心忘副相尊秘閣有書皆博覽岩廊何事不深論
即看拜疏辭

朝後尚引肩輿到苑門

公前赴西苑辭歸上特命肩輿至小東門慰問賜茶真異數

也

詔恩暫許憩林間不比尋常賦遂初別路人皆期健飯

引年公未及懸車一門老去仍同爨八座歸來只舊廬
何物眼前當七發尊鄉亭外有鱸魚

一時祖帳盡名流才子同朝挽不留三殿文章行接武
五湖風月侍歸舟蒹葭隔岸雞催曙橘柚開園雁報秋
我是歐陽門下士柴車何日獲從游

題少詹姪寫經圖時在塞外直廬

我觀人世間知巧競一途乃至事所生虛名亦求沽不
見古孝子用心常近愚愚則本乎樸樸為誠所孚苟有

禪於親寧論事有無味經祈冥福此語傳浮圖庶幾抱
微誠上答父母劬通乎立教意可以輔吾儒宮詹吾宗
賢至性具髮膚少稟二人訓學優過庭趨出為鸞鳳鳴
歸作膝下雛中承贈君訃痛絕天難呼北堂垂白母為
爾增歔吁黽勉進水漿傷哉反哺烏母氏繼下世兩喪
一時俱平生風木悲血泪交模糊君時年盛壯頓覺形
神臞霜寒宵寢磚味苦晝如茶旁人競相勸勸保七尺
軀似聞西方經報恩古有諸親恩等山岳子報真錙銖

遂發寫經願寸心還區區幃前一瓣香几上墨一盃竭
我兩眼力拚我十指瘡眼昏指如椎口誦足雙跌誦已
還慟哭哭罷復細書如此踰兩年白抽頭髮須當其迫
沈痛信筆非臨撫果然妙蓮華一一紙上敷一卷萬餘
字七卷七萬餘人天合掌敬燦若琳琅珠俞子亦好手
為君寫成圖今來十五霜故山拱楸梧偶然展卷看清
泪猶承臚我生乃鮮民蹤跡歎早孤先人尚淺土齒髮
日夜枯作詩志吾媿汗出成沾濡

八月十三日

駕幸翁牛特恭紀時八公主下嫁於都倫郡王

一統車書域三朝雨露天名藩星拱極

法駕日臨邊遐裔元家貴崇姻

聖代聯肅雖輿衛盛錫眷禮文全事與和親異

恩加屬國專不煩湯沐邑特給水衡錢甸服居相近華

風被獨先丹青開殿宇錦繡裏山川封爵原仍舊王庭

遂不遷副車常侍

輦駙馬每從田負弩鸞鑣下呼嵩豹仗前從看外孫國
望幸自年年

木克帶西行十八里山下有湯泉

北行漸入苦寒鄉喜見湯泉湧道旁自覺溫能回秦谷
或云下必有砂牀波痕消盡冰霜氣石髓流為草木香
便作解衣盤礴地暫時休澣也清涼

中秋夜柳林口翫月與玉符先生及亮功紫滄
酉君三同年小飲偶成十六韻

露白霜清候千巖萬樹頭銀河斜繞塞金鏡迥懸秋輪
自東隅上光從西極流天長雄鼓角野靜散艷貅星火
移躔避關山倒景收賞應同

北闕興不減南樓蕭爽披襟得高空與目謀幾年叨扈
從一夕抵旬休已免攜衾直還為秉燭遊王程千里共
恩賜兩宮稠佳果充枌按鮮禽入膳羞班荆傳酒令隔
幔數更籌餅似團圞樣詩須酌酌酬老狂尤爛熳小坐
獨遲留明日追成夢吾生笑若浮起來林影下嵐翠濕

衣裘

八月十九日 皇太子睿賜初白菴扁額恭紀

十六韻

地近瞻 儲聖天高鑒積誠三光開 睿筆四海識菴
名夙昔棲禪志今來戀

闕情青雲垂欲上白髮正初生有作皆邀 賞非才竊
自驚蓬茅沾雨潤葵藿向陽傾感激桑榆晚駢馳歲月
更去家無累遺下直有僧迎往往誇儕輩時時詒 寵

榮一瓢蟠木癭

松癭

三秀紫芝莖匣許香楠貯

賜帶數珠

于孟

教淨水盛

頗黎水盂

白卮傳漢玉綠硯琢洮瓊是物皆堪供

以上六種皆兩宮前後賜物

何年築始成雖蒙頒扁額未敢計柴荆

蟻蝨微生賤龍蛇尺幅盈萬鈞餘腕力 恩重倍難擎

塞外大風二十四韻索同直諸公和

天上箕星動山中月暈生土囊俄出口沙磧欲填平
猛拔羣峰立喧招萬籟迎奔衝來若鶩颯杳去如傾牛馬
渾難辨蛟龍怒欲爭蓄威雷隱轉助氣鼓砰鎗劍戟齊

攻壘波濤迥撼城，餓鷗當晝叫饑虎。傍人行鼠點藏深，
穴蟲僵跼斷莖草。埋蛇鼻淺寒噤蝟，毛撐昨夜還防雪。
今朝竟得晴駟雲，成片轉石落崢嶸。鴉起斜行亂雕
盤，遠勢成向南。惟雁路直上，是鵬程。曠本難終日，狂猶
逞。二更將收偏作力，忽散寂無聲。谷以虛能受，心緣靜
不驚。勿愁開索籥，祇是聽竽笙。袞袞除塵塊，悠悠指旆
旌。回頭千樹禿，稱體一裘輕。酒近移床暖，爐添宿火明。
却看天宇曠，翻覺塞垣清。落帽知何處，飄蓬且自征。蘭

臺多賦手小律倘同賡

行經玲瓏山下

鑿開渾沌得玲瓏
片石居然絕塞雄
地肺想從山竇入
天台信有石梁通
風雲嗑吸千尋表
日月迴環一竅中
莫怪經過屢回望
佳名却與故山同

余鄉餘抗縣亦有玲瓏山

八月二十三日

上入山行圍射獲白鹿一頭恭紀十韻

白鹿非凡種
仙山歲月長
出當時有道
瑞叶

壽無疆洞口眠時月原頭望處霜明明開射的皎皎入
圍場碧砮千鈞鏃瑶星一道芒最宜豨並獻肯與豹深
藏至潔斑同雪如膏色勝蒼皮能留素質草不療金創
雕俎充庖味銀毫耀眼光謬慙陪羽獵作頌比麟祥

酉君分餉黎藕賦謝十六韻

行廚滋味重肥膩饜牛羊正爾宜佳果俄看致滿筐遠
分慈母惠特並故人嘗藕抱玲瓏質黎含沆瀣漿嫩疑
新出水紅似乍經霜洗剔親教淨摩娑愛倍常大瓢斟

雪汁小片截瓊肪
鬆脆鳴牙頰
芳鮮潤肺腸
真堪解渴
況乃佐清涼
我本柴桑士
居連苧藻塘
踏泥風葉底
摘穎露離旁
賣菜多求益
堆盤輒賤償
幾曾虛野饋
長是及隣莊
物理因希貴
人情感舊長
鑿池從憶白
入谷每思張
二者今兼得
何須問故鄉

道旁家

其一在土城南岡上石獅二白碑一統
其一在土城東十里石儿一石亭一上

刊孝敬之墓四字
姓名皆無可考

衰草茫茫近土城
白碑相望兩荒塋
當時馬革尸同裹

今日牛眠地總平野火漫容荆棘長塞田并乏子孫耕
有知含笑曹瞞拙欲刻征西占墓名

重過玲瓏嶺看霜林作十二韻

肇朔重來路秋容最好時往年經雪早今歲得霜遲二
月花相似千林景特奇問名難辨種設色故多姿濃淡
丹黃葉交加爛熳枝簇來成綺繡疎處度旌旗換眼層
層別迴鞭步步隨已憐侵暮色還與發華滋粧點江南
畫鋪張塞外詩衰顏熏欲醉白髮巧相欺好事何人賞

登高此地宜丁寧朔風候旦晚莫狂吹

聞同年顧書宣前輩湖廣訃音愴懷今昔成五

十韻

絕塞來函問初疑後果真恨難埋厚地狂欲問蒼旻憶
昔充鄉貢時同忝國賓紅箋通姓氏麗正約比隣名稍

居姜後

癸酉同舉京兆書宣名在十八西溟十九余二十

心常與顧親雁行聯

弱羽魚隊狎凡鱗雨雪連床數篇章擊節頻嗜啜良有
癖遭砭各無嗔搜剔疵瑕出銷鎔鑄鐵純偷來輸格律

讀罷爽精神自爾投膠漆何曾計屈伸禮闈看再舉臚

唱聽移句獨脫囊中穎先呈席上珍列科登一甲同榜

得三人金馬聲華盛芝蘭臭味均

甲戌殿試書宣第一
甲第二丁丑西漢一

甲第三庚辰余房師汪公
一甲第一皆癸酉同榜也

自忘頻下第翻羨早抽身

于若

甲戌冬乞
假回籍

病喜鷗情適閒教鶴性馴落帆揚子夜踏月

廣陵春出處都如夢參商那記巡分攜從甲戌會合又

庚辰却話青雲舊俱添白髮新木樨參佛法黃葉證前

因

黃葉打醒游子夢木樨參透老僧
禪余與書宣同宿天寧僧舍句也

景已當搖落衰拚

向隱淪未成棲倦翼寧免作勞薪元老開黃閣微名達

紫宸

壬午冬余因京江相國之薦召直南書房

寸長嗟莫效六論笑空陳

釋褐推先輩含毫托後塵我仍留

輦下君亦起漳濱

癸未冬書宣方還朝

花底隨朝謁燈前惠討論

詞源寬萬頃筆陣敵千鈞妙斲斤能運奇方手不龜與

圖歸指掌道路識迷津

乙酉冬書宣奉旨入直南薰殿纂輯方輿路程

乙覽皆稱善公才久合掄使車方簡命省試且陶甄場

屋收羅鄴門牆進郊詵為爐分玉石握管稱金銀藉稔

徒喧謗從容視笑顰不慙膺

特眷彌覺重詞臣

紀進士榜發後事

遂啓扶風帳重持大雅輪

楚材傳自古儒術近尤振辭

闕還瞻戀之官亦苦辛行期何冉冉別語太諄諄

君于初春

奉督學湖廣之命四月中乃出都臨行時頗以善病為慮

北轍俄經夏

時余扈從避暑口外

南轅似隔晨鯉書猶待寄鵬賦忽遘臻江夏文星墜瀟

湘士氣泯雖云蒙

寵異實未展經綸澤國秋多慘騷人例豈循歸旌千里

遠宦況一生貧憔悴孤蹤在淒涼往跡湮老年殊少泪
痛極為沾巾

院長惠裘一襲賦謝十韻

推解情何厚炎涼序忽遷初過搖扇景已迫授衣天蒼
腋茸交密銀貂色最鮮製成微霰候拜賜朔風前輕暖
渾踰帛奇温又勝綿禿襟便跨馬短後稱垂鞭褻襲隨
時尚冰霜是夙緣曉披迴醉纈夜脫聳吟肩袖裏攜新
卷箱中感舊壇敝裘從唱和回首十三年

癸酉冬余作
敝裘詩先生

與西溟實君元
龍皆有和章

謝院長贈馬十二韻

廿載曾徒步三年會上雍借驢長自笑騎馬忽相從華

殿蒙分賜貧家慮乏供品應超脫兔種本出飛龍

宋時學士

例賜飛龍殿馬

突過風前影難尋月下蹤蹴冰蹄似鉄批竹耳

成鋒一色全凝雪三花待刷鬃密看毛細膩垂愛尾鬣

鬆王濟雖多癖孫陽詎易逢駟憐盛壯剪拂愧衰慵

捷徑休爭取歸途幸見容最宜隨下澤安穩代扶筇

半截塔次院長韻

龍沙茫茫荒怪集佛界剗天絕梯級誰興此塔此山中
高湧蓮華嵌空立大千起滅微塵過小劫須臾轉輪急
頑礪亂礫泐作堆風雨猶疑鬼神入當時委蛻兩夫婦

華表歸來改城邑

相傳元時有某萬戶與其妻棄官學佛從後合葬于此

冰天下

壓巔頂平雪谷深埋半腰及我來訪古興桓地欲寫山
川入行笈每逢陳跡輒徘徊口業未停餘宿習草間定
有碑銘在野火燒殘沮如濕國書難考奇渥溫筆授惜

少鳩摩什公詩紀實良足徵歸去皇輿付編輯

院長惠家製金銀花露一餅賦謝二十韻

佳名傳本草舊識鷺鷥藤黃白移時變金銀任俗稱但
聞兼葉曬寧解帶花蒸方法誰邊得園林手種畝栽培
無棄物筐筥亦時登離密開從徧枝繁采勿勝製乘香
未散候視氣先騰倒挽河車水徐收井甃繩夜窗珠滴
瀝晨旭露鮮澄澹比初融雪清於乍釋冰恍疑仙掌露
直向玉盤凝出火經三日浮餅貯半升諒非供熱客間

或餉良朋邊地尤難致屢襟豈易膺流匙宜少許瀉盞
感多承點酒奇芬溢和茶別味增唇沾良已足肺潤更
相應沆瀣啓仙侶醍醐問老僧薔薇紅莫擬玫瑰紫休
矜白戰聊成咏慙無故事徵

重陽日度木倫喀喇沁

亂山高下入圍場掠面西風似弩強馬足聲乾千澗葉
雁羣寒警一裘霜登臨豈必皆吾土今古閒消幾夕陽
記取題糕重九節燎毛燔肉共分麋

是日撒圍
賜麋一頭

雪後隨

駕度汗鐵木兒嶺

校獵秋初罷

回鑿雪乍零雲峯晴晶晶風磴曉泠泠
換景供吟筆收
圖入畫屏萬株枯樹頂獨愛一松青

重過唐山營

去日村村翠剡堆歸時碌碌廣場開
天教朔野西成早
又待君王射兔來

發波羅火屯至藍旗營

劔分一嶺隔西東

自駱駝嶺東北為校獵之區其西南則山莊也

半月風光迥

不同沙磧人歸黃落後山家烟起翠微中
先穫水落浮橋路盡通誰信古來甌脫地築場樊圃入

幽風

自星龕岩歸至烏城道中重見霜林西君有詩

再次前韻

過眼當搖落繁華又一時地非千里遠候較兩旬遲
睠

日晨猶麗烘霞暖更奇黃留將雪景紅發未霜姿秀拔
多喬木輪菌乏醜枝似燒原上火愛映酒邊旗猶憶衝
炎去曾經緩轡隨綠陰晴借爽潤色雨添滋忽換登高
屐來題看葉詩含情如見待有信不吾欺榮悴天難主
妍媸分各宜本非松與栢那免受風吹

九月十四日烏城旅舍連接諸弟諸兒兩孫八
信口占一律

燈花如穗吐烟煤果有家書出塞來三處豈應同日發

八函却喜一時開
勸餐兄弟憐年長
到眼兒孫抵夢回
為報老懷殊不惡
地爐氈帳撥寒灰

重陽後十日入古北口

踏徧雲中雪
外山敝裘重
脫柳重攀寒
花過節如迎客
朔雁先期已
度關官馬散
隨黃犢卧戍
兵秋較老農
閒勞生屬有
駟馳分黔數
三年六往還

石匣城南村民有駕牛墾田者

上駐蹕親履田間
扶犁行百餘步
一時觀者萬人咸謂

聖主重農勸穡至意真千古所未有臣身叨侍從目覩

盛事恭紀二十韻

雲捲三秋稻霜清百頃陂

君王除警蹕郊甸正鎡基近接

鸞輿過羣瞻

玉趾移羽林分仗立耕叟執鞭隨龍見天垂象牛馴

帝解縻沾犂皆雨露被隴即京坻久悉艱難意重蒙疾

苦咨事傳千載盛

恩豈一夫私自昔豐稷慶嘗聞史冊垂紺轅曾屢駕黛
耜亦頻施千畝周官籍三推月令儀大都修典禮已謂
致恬熙幾見勤民

主行當省斂時西疇躬自蹈田器手親持積厚培尤力
居高履愈卑九州胥樂土

萬乘是農師擊壤歌相勸吹豳繪總宜人歡聲動地風
遠播為詩作所陳無逸釐成付有司小臣慙頌述振古
孰如茲

俞扶九寓齋賞菊分韻得時字

關榆塞柳別經時一夕從君那得辭
衝雪人過重九節
傲霜花剩半開枝
寒香泛夜差宜酒
病眼經秋漸怯詩

記取燈前論聚散
明年相憶在東籬

時余將請
假南歸

題張研齋前輩桃花流水圖小照

時在西
苑直廬

北風夜狂轉冬律
墜葉堦墀寒瑟瑟
生綃忽展橫幅圖
暖氣春回映簾日
垂楊夾岸水沒篙
碧色染透胭脂毫
晴霞燒空半天赤
點出萬枝深淺桃
玉堂學士神仙客

每到花時懷舊陌鷺鷥翹足鷗刷翎下有鯪魚長一尺
船頭舉網船尾吹何如斫鱸留蓮池披圖空看畫中景
對鏡微添頷下髭我昨南帆經古皖棹入縱江春過半
至今清夢繞龍眠三十六峯紅不斷可憐此地不相逢
却在雲窗霧閣中青蘋綠蓼何日辨且教閒處付漁翁

敬業堂詩集卷三十三

欽定四庫全書

敬業堂詩集卷三十四

翰林院編修查慎行撰

西阡集

起丙戌十月
盡十二月

凡詞臣請假韓親者例移吏部須六年俸滿方與
彙題余自癸未入館甲申授職通計前後歷俸未
滿四年丙戌秋杪隨

駕歸自口外於直廬冒昧陳情叨蒙

聖恩俯允所請誠異數也回思先母見背已三十五年
先君棄養已二十九年矣長恐湫先朝露負土無
期今乃得買地西阡歸營大事吾子若孫履斯阡
也當念貧家葬親之不易益感

聖朝卹下之深仁則茲集所留特涕泗之痕而已
恩賜白金二百兩恭紀十韻

竊祿清華地霑

恩湛露天朱提頌少府白銀速微員優倍三年俸榮踰

萬選錢貺非金穴比

旨白玉堂宣重馬歸時載空囊補處穿春衣還質庫客
座設青氈暴富隣翁問長貧爨婢憐每持清白誠還望
子孫賢不敢享

君惠行將置墓田孤生餘頂踵感泣為光先

時先人尚未營葬將

以賜金
買地

乞假葬親南歸 睿賜騾馬二匹恭紀二十韻

連騎 東朝出輝煌照路岐來從蒺藜苑產自渥洼池

騾馬名雖別龍麟種並孳漆光明似鑑

純騾色黑

紫欲潤無

疵

馬色純紫

抖擻塵沙淨開張骨骼奇八蹄行互舉雙尾立

交垂共飲無踈齒同槽免繫維曹韓師畫理湛岳比妍

姿

東坡詩馬中湛岳有妍姿

天廡方登用房星忽下移聯翩驚異數

蕃錫荷恩私臣本駕駘質生逢

特達知昨來衣白袷今去鞵青絲屬有駟馳分真當愛
惜騎芻芟慙厚給鞭策敢輕施每憶重經處寧忘徒步
時雪深東郭履寒勒灞橋詩歸徑逡巡識旁人指點疑

力衰輸盛壯心在冀追隨數齒殊多感齊衡轉自嗤長
鳴同戀

主臨發又遲遲

將出都留別院長及同直諸公四首

有生長恐負

君親白首清班忝後塵蘭畹草生聊自託鳳池鷗入亦
相馴關門柳色三經夏苑路花光四及春總是
思波最寬處就中容得濫竽人

窳窳先人久未營隨身挈涕每縱橫微官敢作歸田計
聖主能憐負土情篋有

賜書裝不薄囊惟襍被累差輕只慙駕鈍宜長放尚與

驛騮逐隊行

去年九月 皇上賜馬一疋今年十月
皇太子賜騾馬二疋院長亦曾惠馬故及

之

勿論解組與彈冠直為

天高仰報難情重繞朝新贈策夢深星瀨舊投竿

九重禁闥深嚴地七品年勞本分官倘許衡茅專一壑

猶能曝背話

金鑿

得歸未掃舊巢痕

用東坡詩中意

去住心孤但自捫列宿回瞻

天北極單車獨赴國西門檀溪屋老將誰主粟里田蕪
尚有村長羨冥鴻在寥廓不曾輕受稻梁恩

與潤木別於彰儀門外

自我住京師五年裘換紵名成時已晚

恩重歸敢遽子臣虞兩負方寸亂徐庶請急太匆匆痛

深創實鉅親亡未克葬貧到傷心處追憶初喪時悲端
非一緒汝時尚角巾至性本天具今來強仕踰將伯實
堪助同歸苦未得時弟亦欲乞假而未遂萬事料難預送我出修
門殷殷戒徒御我行營大事家督難自恕饑凍固其常
兒孫何足慮來騎蹇驢來去駕柴車去風吹日杲杲飄
散蘆花絮灑淚各無言哀歌聊自叙

晚抵良鄉

近畿積雨後大道成塗泥舊時攔馬牆今作蓄水堤眼

中有歧徑涉足恒恐迷正賴孤塔高前行辨東西南來
者誰子賓從相排擠光輝溢路旁簇簇千輪蹄倉卒為
引避我車若雞栖

早過涿州

曙色朦朧十里橋城端雙塔聳峒堯層冰欲裂風何橫
濃日如熏霧忽消新闢河淤半蕪沒舊攀沙柳尚蕭條
出畿便是田園路南望三千未覺遙

五更發高碑店

久作京華客鄉程夢易迷分明茅店月猶誤早朝雞

食安肅菜

老夫居貧曾種菜露韭霜菘成替代竭來竊食大官廚
百甕黃虀剩餘債歸程晚經安肅縣一碧環城雪初蓋
流涎大似逢麩車頤朶腸鳴難久待頃筐雖乏園官送
求益何妨擔夫賣銀刀削葉土銚烹柔滑清甘美無對
花猪肥豎真堪唾野飯村沽差足配家童相顧旁愕眙
不信主人心篤愛我願當官知此味腹剝毋為里閭害

又願民間無此色春社祈年秋報賽菜畦不熉田不蝗
過客盤餐聊一快

渡三义河沙滋唐三水合流於此

百里平陂際白沙滋唐兩派匯三义樹頭小扇風旗影

舊識中羊村

名賣酒家

重入東鹿境宿清官店先寄兒建十二韻

上谷南來少戍墩

自張墩以南
道旁無垓

天寒日薄易黃昏重穿

野水平沙路又宿柴門老樹村地遠郊圻殊僻左人隨

歲月劇驚奔遠迎何敢煩丞尉

黃丞趙尉至此相迎

再到惟欣長

子孫顧我便能偕隱否問渠可有去思存

時兒建循例量移將離任

矣一家飽暖踰初望百里絃歌盡

國恩捧檄當時聊自慰折腰今日且休論仰邀天幸年
頻稔下賴民淳訟少寃成就汝為無過吏保全家是舊
清門雖無餘力營三徑已忝廉名達

九閩酒盞久拋思共把燈花何喜遽能繁明朝飲馬滹
沱側好對清流驗髣髴痕

乙亥秋與許霜巖同過深州忽忽十二年矣重
經此地題壁依然時許遠宦滇南口占寄之

飛鴻一散天南北指爪痕從壞壁留惆悵城南獨吟客
夕陽隨影過深州

饒陽道中作

我前冬日暖我後北風狂向背苟異宜一身判陰陽矧
乃別形體疾痛馬能詳造物豈不仁饑寒盈道旁目存
力匪逮惻惻中自傷

曉發河間黃昏抵大城縣

瀛海東來路漫漫
百里長田荒薪比桂
潦退鱸如霜
牛跡迷朝霧
鴉聲散夕陽
誰憐畿內地
經眼有蒼涼

奉謁座主少宗伯許公於大城官署敬呈二律

一城斗大控河壩
析木遙從天漢連
永賴渠成傳萬世

暫勞公出已三年

時子牙河堤告成報績不遠矣

棠陰樹樹堤邊柳
膏

澤村村葑上田漳
滏池皆底績
不曾輕費水衡錢

秩宗兼職領司空
畿輔行看奏禹功
憶送羶車衝朔雪

重來水署坐春風
何人愛士同迂叟
從此歸田望醉翁
準備籃輿候三徑
先傳鄉信到江東

曲路店遇吳元朗

去國非初約相逢
淚一揮余因營葬
出君亦帶星歸

時元

朗丁
內艱
衰柳催蓬鬢
枯風裂布衣
半生知己分
到此倍依依

大風抵張夏戲題旅壁

四幅帷裳巧障風
到來村巷聚兒童
此中閉置疑新婦

一笑那知是老翁

崗山栢

戢戢排行欲及千黃楊小厄故依然廿年野火荒山道
看爾幾成劫後仙

長清山行

曉露趁殘更荒雞失次鳴嚴霜升井氣落木走風聲
道衝沙聚山牆疊石成大都生瘿俗磊塊總難平

泰安州題壁

少負狂名老好奇逢山興發尚淋漓如何十度城南宿
不敢輕題望岱詩

長至日山左道中即目書懷二十四韵

一線添歸日初陽放曉晴細泉水底咽枯草燒餘萌土
瘠逢人問年衰換節驚滿前憐凍餒即事歎淒清此地
初荒早相傳半死生

至尊憂獨切當事責差輕足陌千緡給留漕萬數盈不
教移積粟專欲活殘甿碩鼠成羣聚哀鴻四散鳴民貧

寧樂禍官賑特空名受爵能無愧增階竟冒榮牛羊難
問種雞犬乍聞聲正使流亡復懸知疾苦併如何經儉
歲尚爾廢深耕聖飾郵亭麗修治平道路平戍旗雙隻
堠墟落短長程僅免追呼擾幾同力役征辛勤偕婦女
率作及兒嬰望幸心雖結安巢計未成

皇仁終見憫吏治亟宜更自笑犂鋤叟來隨商旅行何
曾受芻牧直是惜娶惇暖律回鄉夢寒灰付官情所祈
年穀熟終老卧柴荆

羊太傅故里

班書源可考系出秦山羊世已經千載魂應戀故鄉功名論際會氏族閱興亡峴首沈碑後何須感歎長

新泰城南望整山

孤峯截斷連山脈大似人間獨立人地湧雲根浮縹緲

一名青雲山

天生石骨瘦嶙峋仰瞻泰岱旁無附平揖徂徠

近作隣不用多生閒草木免教榮落改冬春

旅店食雉兔作

頻歲叨陪獵秋田雉兔肥中官馳馬

賜侍從掛鞍歸北上何年再南烹此味稀經過慙野饋
寂寞慰朝饑

蒙陰城東十餘里地名城子莊壬午初秋曾一
飯於此水旱之餘居民百餘家轉徙殆盡惟舊
時逆旅主人在耳感歎不已紀之以詩

敗茅頽壁兩三間百室漂流偶一還記得往年題句在
豆花棚下看蒙山

抱犢詞

桃墟道中見一老叟抱黃犢騎驢而行戲作

東村牛旣秋不熟別向村西買黃犢買成抱上蹇驢騎
驢尾稀如翁鬢禿驢今馱翁復馱畜步步施鞭母乃酷
人情厚薄從古然或加諸膝或墜淵

古明鏡詞

見道旁醜婦而作

人間有真色嬌者顏如蓮東家欲效之紅白調朱鉛衆
方賞塗抹羣謂醜者妍好女不自明詎藉旁人憐妍媸
果若從人定何用團團鑄明鏡

沂州出山

沙淺沙深突復均一行疎樹帶烟郊山經齊魯青纔了
馬渡沂沂碧未膠小圃重樊因枳棋浮橋粗就賴蘆茭
經旬尚滯黃河北漸喜魚羹入客庖

淮北聞雁

風急霜清欲渡淮數聲客夢鷺鷥回與誰好作江湖伴
東坡詩我衰寄江
湖老伴雜鷺鷥鴨憐汝亦從邊塞來殘月曉催千片落

長天寒曳一繩開蓮房菰米沈波後集澤羣多亦可哀

夏秋之交淮
南北皆被水

從宿遷登舟連夜渡河

勞筋貪暫息買棹聽漁歌漸與江淮近自然鴻雁多
沙無斷岸急浪有盤渦忽報晨水合吾舟已渡河

黃河中流見月出口占一絕

誰謂河流濁吾疑徹底清一眉殘月影鏡裏看初生

發清江浦二首

南來步步遠風霾川路晨征一倍佳竹筵蒲帆渾不用

櫓聲如雁下長淮

編蘆縛荻聚成堆大舸多從江外來
試問老堤堤畔柳年年辛苦為誰栽

重晤大司農徐浩軒先生於淮上二首

邊風朔雪灑重裘猶記鋒車一夕留
却到淮陽冬候暖

滿窗紅日話中秋

中秋前先生復命至塞外于柳林口行帳中盤桓半日

河堤本是司空職計相重乘使者軺
館閣人情久延佇

江湖粗了合還朝

先生以大司農兼翰林掌院教習庶常似不應久于外故云

張運青先生見餉食物遣人遠致于四十里外
以詩奉謝

見說官廚儉淮流孰與清於公無媿色餉我見真情追
送煩郵使分嘗徧老兵道旁傳異事此客勿相輕

寶應雨泊

冒雨衝泥取次行多年不聽滴篷聲此聲好是治聾藥
老耳孤燈分外清

曉晴發寶應喜得順風先寄德尹揚州

安宜城外雨餘天
晨旭初生血樣鮮
湖似貫珠行不盡
秦少游詩高邦西北多雲隨
飛鳥勢爭先
離心各抱三
巨湖纍纍相連如貫珠
年外短夢難禁
兩日前一事報渠差
快意好風添送順
流船

掛帆行六十里將抵界首風勢轉狂小舟不敢
下閘戲成二絕

閘口狂風撼柁樓
隄邊驚浪聚浮漚
何妨暫作須臾住
只算荒灣過石尤

石尤風緊人知避我獨逡巡避順風不謂有風行不得
掛帆何必急流中

高郵道中

北風吹折荒灘蘆四無頃畝純浸湖周遭三十六陂水
中置一城形覆盂

蔣之奇詩中間可以置城頭角聲曉
戍城隱然高阜如覆盂

如訴城外人家半漁戶我來正及積潦收但見飛鳧導
前路買魚射鴨值幾錢所愁米貴厨無烟水鄉作客大
不易嗟爾居民誠可憐

大雪夜泊瓜洲二首

茱萸灣北晨沽酒
瓜字洲南夜泊船
我自只如常日醉
人言風雪滿江天

歸途未免防水雪
一月晴和竟似春
今日漁蓑堪入畫
天公原不薄歸人

雪後渡揚子江

廿里風程一霎間
海門晴色帶潮還
白頭浪裏參差影
看盡江南雪後山

舟過丹陽有感於范堯夫事漫成一律

郵籤朝過曲阿城，又是江東第二程。
一刺投名羞俗態，十年為客見人情。
當時已少郭元振，故友誰如石曼卿。

預遣家書刻歸日，兒童不用遠相迎。

是日遣老僕先歸

三十年來舟過無錫，未嘗再游惠山口。
占解嘲來往如梭，三十年不曾重酌德池泉。
他時終作法雲老，償取平生未了緣。

膠山在無錫縣東四十里，九域志云山南有梁

蕭侍郎故宅今無可考矣

蕭蕭雁鷺鳴枯蒲南朝侍郎宅有無膠山漸近惠山遠
中隔芙蓉一片湖

渡尚父湖晚抵虞山二首

烟村雨浦遞灣濼忽入澄湖杳藹間常愛大癡橫幅好
不知粉本在虞山

長松高下蔭坡陀老柳參差蘸碧波咫尺吳門風景別
山塘十里稻堆多

過錢玉友河亭話舊二首時已收身奉佛但未

廢飲耳

團蒲旁著一龕燈韁鎖中無杜伯升

事見東坡詩

長恐入門

遭痛棒對君吾是啞羊僧

不愛天花作道場萬緣消盡酒難忘

白樂天有何從今處難忘酒詩

方丈維摩室添辦清香祀杜康

與許暘谷時許初自山右歸

一笑還家未覺貧奉承堂上白頭親可憐我亦稱人子

負米歸來晚為身

少陵詩負米晚為身每食臉必泣

西阡雜感五首

銜恤三十年今方卜城域有身彌自痛負土假人力

其二

兩山如玦抱一水縈紆注落葉滿西阡別家墳上樹

其三

坡陁非丈五馬鬣是新封小著樊籬護須防鹿觸松

其四

墓田故無多又占數間屋庶望子孫賢既耕且還讀

其五

一門四兄弟去住難自主丙舍幸已成神傷對牀兩

時潤

木乞假
未得

除夕與德尹信菴守歲二首

駮雞斃酒錢殘年餽歲鄉風自昔傳不為盤餐營口腹
老來情味合歸田

家貧未免思游宦及至成名累有官畢竟商量何計穩

白頭兄弟一堂難

迎鑾集

起丁亥正月盡一年

丙戌偪臘抵家營先人葬事畢將於西阡築舍為
休息計會

天子閱河南巡在籍臣僚例應遠迎明年正月買舟渡
河隨

鑾自淮陽抵江寧至蘇杭五月初於高郵送

駕再展六月之假乃復歸里通計一年中息肩不過二

百日懶不作詩僅得如干首

園梅垂放而主人將出門口占一絕

冰雪禁繁蕤萼苔畏老枝吾閒猶未得不謂爾開遲

錢玉友有見寄長篇極論作詩之旨終以傳世
相期許兼承不朽之託連日阻風虎邱舟中無
事賦此奉酬

吾觀工畫人胸本蘊丘壑雲烟資變幻山水赴脈絡又
聞國手碁惜子不輕落翻新布奇勢全局如一著良醫

去成見因病施方藥巧匠先量材運斤乃盤礴羿射無
詭遇騶琴有驛攫高僧厭苦空入棒解拘縛老仙出狡
獪九鎖啟索籥惟詩亦云然衆美視斟酌神功須力到
佳境豈意度人皆信手成熟肯苦心作同心得錢子洞
見非隔膜惜哉方逃禪此道付糟粕偶然一吐露萬象
互醜酢足知精進幢隨事無退却投篇過推許不量余
所作平生知已分夙昔慎唯諾寧待遲暮年重為不朽

託君其益自愛藏藁手親削

玉友近編所作詩
九卷名撫雲集

夜泊京口

誰信勞生有路難
山川猶作故鄉看
風翻石壁連城動
潮滿江船出口寬
細火一星疑遠市
重裘二月尚春寒
東君不管梅花信
任向高樓笛裏殘

奉和座主相國澤州公吳橋道中見寄之作敬

次原韵

時扈
蹕南巡

浮浮薊北烟曖曖
江南樹聞公陪輦
出延佇凡幾度早
梅已飄香繁杏亦
修嫵惟占燕雀喜
詎觸蛟蜃怒挂席

下清淮馳情快前過詩高有孤唱興愜無長路絮暖茱
萸灣風輕桃葉渡舊遊吟未足更向湖山去

院長揆公出都時亦有詩見寄清江舟中出以

索和奉次原韻並簡唐東江考功

清音天半落松杉吟傍仙舟響亦凡夜雨一篙平岾水
春蒲十幅渡河帆不辭醉咏花歌帽預擬題襟墨漬衫
為報東江老居士速馳詩遞答來函

揚州城外觀燈船和友人韻二首

琉璃一片映珊瑚上有青天下有湖
岬岬樓臺開畫錦
船船絃索曳歌珠二分明月收光避
千隊驪龍逐仗趨
不為水嬉誇盛事萬人連夕樂堯衢

錦纜朱欄綵鷁羣滿川春暖氣如熏
倒窺銀海千枝燄
迸散金波五色雲雁齒初裝虹有暈
魚鱗不動水無紋
君王到處皆勤政猶自宵衣坐夜分

題湘雨禪師宙亭詩集後師乞余作序故落句
及之

九僧歿後名僧少今見詩中第十人傾倒盃囊千斛水
洗空衣襪七條塵秋田領鶴精神爽春谷聞蘭臭味親
不敢與師多作序欲離文字證前因

初登金山

齋鐘浴鼓平生夢垂老方成扈蹕遊忽聽潮聲分兩派
信知樹影在中流千檣雲霧浮孤塢三岳樓臺聚一漚
終脫朝衫穿野衲卓菴閒地幸相留

清明喜霽再登金山同院長作

片颿重過潤州城曙色東來海氣晴
千點桃花一江水
妙高峰下作清明

雨後隨

駕發龍潭抵江寧

晨隨羽衛發龍潭
雨氣初收日色暹
驛路馬嘶泥滑滑
野田雉雥麥漸漸
六朝烟柳攀罾岍
三月風花賣酒帘
擊壤吹幽聲一概尚煩

停蹕問茆檐

隨

駕謁明太祖孝陵恭紀十二韻

明祖山林在

天家祀典昭千官隨虎旅

萬乘駐鸞鑣風雨東來近江關北睇遙石城蟠脈厚靈
谷蓄泉饒狐兔何曾窟松楸竟不凋運雖經鼎革

詔特禁芻蕘下馬坊猶聳複恩殿忍燒遺民安率土

聖主念前朝本以仁除暴還同舜紹堯統傳心有契社

廢廟無祧陵戶煩增置神宮儼舊寮霸圖卑六代園
寢任蕭條

院長見贈大篇過蒙推獎次韻奉酬

騷雅本正聲沿流乃盡變前賢不苟作寸錦勝匹練自
從篇什繁觀者目易眩公才擬日星有作萬人見圭璋
既特達氣類必引薦賞竒神有交嗜善誨不倦手持大
圓鏡盡攝諸方彥高談折深源小智窮曼倩伊余好吟
咏宿昔弄柔翰駑駘百舍趨追驥不及半人言桃李春

自顧桑榆晏雄辭荷獎借照眼驚璀璨穆穆被清風
嘒嘒將旦和章如草木披拂聊供翫

自葑門至崑山舟中作

鯉魚橋外綵旗斜乙未亭邊鼓笛譁六十四涇烟水色
半隨

鳳舸泛桃花

鯉魚橋乙未亭皆在葑門外見丘與權築塘記六十四涇詳吳郡志中

立夏日吳山寓樓偕竹垞朱先生及鄭息廬馬

衍齋素村家德尹為櫻筍之會竹垞有詩和答

一首

夏木陰中夏日長
小樓西面吸湖光
簾櫳昨夜猶春雨
花事今年偶故鄉
佳節重逢知幾度
白頭一笑抵千場
朱櫻紫筍家園味
容易山厨得飽嘗

雨中隨

駕泛舟西湖次院長韵五首

看山曾向雨絲中
青苧竿頭弱柳風
今日船從天上坐
亭臺不與昔年同

沿隄畫槳愛徐行但換橋坊不改名
水墨圖中天一色
鷺鷥幾點去分明

澄波何處著纖埃寺面多從鏡裏開
放鶴亭邊聊一憩
居僧猶記探梅來

搖曳垂楊淺水灣心隨魚鳥欲忘還
裏湖行盡外湖出
又露西南兩角山

老去論詩敢自豪從公遊興尚陶陶
袖中攜得西湖去
十幅吟箋勝薛濤

昭慶僧樓同年佟淵若學士步月見訪

滿川烟火氣熏蒸誰解敲門問老僧多謝同年能見訪

上樓初點佛前燈

是夕湖舫烟火最盛

和淵若學士西湖雜咏四首

短牆高閣俯層瀾中有幽人洗眼看漫道放船隨處好

烟波終讓外湖寬

時淵若寓段橋外

雙鳩啼雨又連朝濕翠濛濛隔岸遙好片蘇公隄畔柳

暝人騎馬渡虹橋

賀監狂名老在無酒船一櫂未應孤心知不及閒鷗鷺
拂雨翹烟占此湖

四圍圖畫本天成三面雲山一面城多少才人吟不盡
尚留佳句待先生

雨中過南湖訪老友盛鶴江二首

幾梢新竹透籬根一片蒼苔印屐痕六七年來閒不出
感君為我特開門

烟雨迷離又一春舊遊如夢亦如塵萬緣消盡詩名在

猶替南湖作主人

隨

駕重至虎邱寓直仰蘇樓下

好片生公石重來似十洲為逢僧話舊猶認仰蘇樓

聞兒建到家之信

為貧而仕全家出末路何堪久別離書卷拋來飽魚蠹
田園荒後長榛茨急流自信差能退廉吏誰云不可為
比似遷官還較喜燈花為汝報歸期

吳門舟次喜遇潤木假歸

誰傳遠信自京華
聞汝歸程漸有涯
驟見尚疑俱作客
昨歸翻怪不同車
半年水雪愁為減
一飯江湖勸互加

錯料老夫詩是讖
白頭兄弟盡還家

子去年除夕詩有白頭兄弟一堂難

之句
故云

重酌惠山泉

千章老樹蔭溇泓
不忝茶經第二名
急借匏尊蠲久渴
旋敲石火試新烹
僧無吝色從多汲
客有餘甘為一清

挈得餅罌須穩載，免教地主累張衡。

奉謁侍讀秦公於寄暢園敬呈五章

石龍噴沫轉階除，平碧中涵萬綠俱。
信是有源能不竭，旁分一派給僧廚。

合抱凌雲勢不孤，名材得並豫章無。
平安上報

天顏喜此樹江南，只一株

園中樟樹一本，乃數百年物，上嘗傳問此樹無恙，故云。

山光水色盡沾

恩風月兼留雨露痕

堂中有山光水色松風水月諸額，皆十餘年來御筆屢次題賜者。

頭白村翁傳盛事

鑿輿六度幸名園

德門子弟婉荀陳再見瓊枝玉樹新

謂洛生喬梓

却笑平泉

空作記世家難得是文人

韓公文體杜詩名謝傳家聲白宦情四海只今無執友

從遊應許老門生

辛酉先生典試江西廬陵彭公是科所得士慎行癸酉舉京兆又出彭公

門下例得稱門生

麥秋

桑疇宜暖麥宜寒

宵旰憂勤亦少寬親見江淮民樂業清和天氣好

回鑿

邵伯埭送

駕後歸舟即事二首

埭南埭北鱖魚肥斗野亭邊興不違說與故人應惜別
千帆送盡一帆歸

高寶中央地最低秧針浮水水浮畦露沙雨足牛蹄健

萬頃湖田盡架犁

與德尹自揚州連舫渡江

梅花開後草堂前
準擬春來共醉眠
此福兩人消不得
半年五上渡江船

入夏苦旱六月十五早偕鄉人禱雨烏龍井步
至菩提山真如寺二首

淡月朦朧般若臺
沈沈海岬蔽黃埃
可憐我本無田者
足躡荒山乞雨來

皋蘇遺廟在巖阿

潛說友臨安志云鹽官縣東七十里
有烏龍井廣四尺深七尺冬夏不竭

相傳皋蘇二將軍逐黃巢死於此因祠焉紹興十
年歲旱禱雨即應勅賜濟福廟額在寺南六里

古井年

深不起波好笑兩三垂白叟便思泥首致滂沱

耳聾

五官初廢一萬竅為收聲絲竹吾何與雷霆衆自驚少
閒差省事多笑豈無情社酒如堪治明年試聽鶯

十月十七日病起過隣僧融然房看菊

閒僧仍種菊病叟偶還鄉物色憐寒蝶人情愛晚香開

遲經夏早節爽似秋涼對此增悵吾家徑久荒


周濂溪先生家塾銅章一枚形製奇古其裔孫
歷世寶藏來索題句敬賦一章

道州崛起千年下聖學昭如揭日星遂使大儒承統系
猶留小器覩儀刑摩挲繆篆蟲魚古洗剔銅花翡翠青
不比還珠空寶積子孫長得護精靈

天寧詩僧文緯見過

夕陽影裏鴉投樹落葉聲中犬吠船久矣蓬門無剝啄

偶然葦岬有緣沿孤吟喜接金襴友一味能參玉版禪
時以冬筍見餉絕勝地爐煨芋在為師飽喫送殘年



敬業堂詩集卷三十四

欽定四庫全書

集部

敬業堂詩集卷三十五

六

詳校官左中允_臣塘五珠

助教_臣常循覆勘

總校官庶吉士_臣倉聖脉

校對官中書_臣雷純

謄錄貢生_臣李玉璣

欽定四庫全書

敬業堂詩集卷三十五

翰林院編修查慎行撰

還朝集

起戊子正月盡五月

家居一年展限已滿州縣敦迫就道勢難遂巡一
術士語余曰君欲賦遂初其在壬癸之交乎余笑
而頷之既至都仍內直昔楊誠齋自江西召還陸
務觀有相賀歸館之作今集中所載朝天續集此

其時也後五年從江東賦歸果若術士言則余之
退休亦不遠矣

立春後五日清溪舟中大雪留別談未菴徐任
可十二韻

四野雲俄合孤舟凍始消東風鳴昨夜大雪灑今朝
澗成竒特斯須破寂寥連峰胥挺玉衆水異趨苔委浪
疑鋪練投村誤斷橋微嫌經臘少偏愛入春饒亞白回
梅眼誇輕鬪柳腰近人何脈脈隨我太飄飄吟對知才

減寒禁待酒澆盡圖愁去國蹤跡笑還

朝

時余將北上

莫便欺蘭蕙終須別艾蕭溪山有迷路長恐

失漁樵

聞少詹姪京邸訃音時余方東北裝先馳詩四

章哭之

忽馳家信入新春凶問初傳或未真共訝緘封纔偏臘
不知屬纊已經旬

兩宮遣問無虛日一姓哀榮得幾人屈指輜車定南下

空將老淚灑征塵

早年同學晚同官永訣俄從小別

去年四月杪與
聲山別於揚州哭

有餘哀何日盡死無留憾古來難層霄路近瞻

雙闕淺土年深痛兩棺皋復有靈知不瞑側身天地荷

恩寬

家門先後忝科名臚唱同聽第四聲遲汝八年稱後輩

丁丑春聲山從庶常授編修余
授職在甲申冬月相距八年

長余一月禮先兄

余兩
人皆

庚寅生而聲山長余一月
前奏帖及班次余皆在後故云

籍咸入社名相亞廣受

還鄉夢隔生從此孤踪兼善病菟裘知復幾時營

推挽無端到不才王程何處不追陪每當

宣喚慙臣老

嘗蒙東宮召對以特被
姪故呼慎行曰老查

恩頒恤爾衰

丙戌十月姪病不入直
出人參一斤命慎行齋賜

上七發同朝皆

屬望三年一病竟摧頽可憐烹鯉沈綿候猶寄音書促
我來

過梅里為竹垞先生留一日

鄭重還山約餘年準擬同如何向岐路又復轉孤蓬過

酒衝筵雪維舟拍岸風我衰公早白告別敢忽忽

虎邱花信樓與馬素村別

樓頭樹色已葱葱樓外烟光薄未融客况前遊前度夢

去年二月泊舟樓下五日乃渡江

春程一雨一番風綠蕪望極空濛際

白髮痕深聚散中多感故人臨別意揮絃遙送倦飛鴻

丹陽卽目

連檣旁有小車行不斷伊鴉軋轆聲夾岸坡陀帶殘雪

麥苗青上曲阿城

重過高旻寺留別湘雨長老

萊蕪灣口記停船再叩禪扉已隔年四海僧皈康寶月
三生人說杜樊川閒投拄杖殘雲外倦倚征帆落照前
等是有山歸未得憐師還復望師憐

雪後晚抵儀真

白沙一道走平川野有耕犁步有船萬頃瓊田鋪宿麥
幾村茅屋起蒼烟新泥滑路逢初霽枯樹攀條感昔年
曾是阻風中酒地老來情緒倍依然

乙亥秋從六合
發舟阻風于此

江浦農家

江邑連年旱為農詎免饑牛羊誰是牧雀鼠自能肥野
廢林廬在城蕪戶口稀眼看春社近倘與燕同歸

滁州看山

霧薄疎林晴曖曖雪消幽澗響潺潺曉來衝霧踏殘雪
愛看環滁面面山

欲遊瑯邪山尋醉翁亭不果

征輪兀兀鬢催斑誰遣勞薪不暫閒咫尺西亭行不到

又隨春雁度關山

上人呼清流
關為關山

清流關

一綫飛流百丈清
洩雲歎雨落崢嶸
時平久罷中原戍
地險猶沿五代名
琴筑低昂因石勢
風濤起滅付松聲
瓦鉞茶熟行人渴
只有閒僧管送迎

磨盤山

勿論九折與千盤
涉足誰如此路寬
羊角旋風隨曲曲
磨牛陳跡轉團團
連雲取棧紆終到
峻坂迴車下最難

不是人間無捷徑
漸鴻原自喜盤桓

池河驛

古驛千家聚
鍾離北望孤
河流近淮泗
山脈盡荆塗
客飭論珠貴
村醪計盞沽
明朝貪早發
前路入平蕪

臨淮縣渡河

暴漲衝橋斷
孤城比石堅
中流聲沸地
別浦氣沈烟
渴虎憎關吏
饑鳥仰客船
渡淮魚米賤
隣壤接豐年

淮北道中

隔岸草攢攢人家綠映檐泥中逢驛騎樹杪展風帆暮
色遙天落春寒細雨攙故鄉行漸遠猶未換春衫

冒雨發皇莊入靈壁境泥淖甚深兢兢有失足
之慮車中口占

泥濘忽如許行行險且紆平生無濶步老去復長途不
少前車鑒誰為將伯呼短筇吾賴汝緩急幸攜扶

宿州村家有種栢作籬者戲嘲之

數椽曲木架茅茨雨打風翻大半欹多少荆榛寬束縛

屈將翠栢作樊籬

春寒

杏蕊稀疏菖葉短
田家占候幾回過
春光只似宦情冷
自渡江來風雨多

旅店食紅蓮米飯

見說太丘產紅蓮
稻最良色疑新出
水粒愛乍除芒少陵

詩除芒
子粒紅浙罷鮮于染
炊來軟更薈曾蒙

天上賜往年隨
外官厨曾賜食駕口一飯愧私嘗

永城縣署與唐殿宣飲別

共作風塵吏，聊追夙昔歡。
分攜頻改歲，相勸一加餐。
酒綠禁愁淺，燈紅欲別難。
老深兒女戀，直似故鄉看。

君之長子

余姪壻也，余姪又為君壻，時皆在座。

道旁官柳一樹獨枯

同根連理枝，一樣被風吹。
莫問榮枯意，春工兩不知。

高邱道上戲作兼寄同年宋山言二首

少治春秋老漸疑，宋都舊事記依稀。
近來六鷁多爭進

幾見因風稍退飛

梁園春半好風光
紅杏開隣宋玉牆
苦被時名牽率去
一官頭白校書忙

寧陵喜雨

客過中州愛物華
沙隨城外氣清嘉
轆轤轉井晨澆菜
楸棗開田午種花

地產木棉土人但呼為花今其下種時也

色暎酒壚三尺

紆聲和牛鐸
四輪車空傳杞宋
遺風在喬木
何曾屬世家

贈正華長老并序

去睢州城北十里道旁梵宇俗呼鐵佛寺持住長老
吳人也自言蘇州嚴墓李氏子少依巨德禪師記別
法名正華康熙庚申渡江北遊將赴五臺禮文殊瑞
像一夕經此坐道旁臥鐘下諦視則李正華姓名在
焉恍然悟前生之為行脚僧也茲地舊有佛廬明季
燬於兵火遂發願募化銖積寸累經二十餘年乃薙
草開林凡為殿四重莊嚴像設廊廡周遭僧寮及庖

福之所共六十餘間仍以餘金買常住田二頃飯南
北往來緇衆今寺成而年老矣余覩而異之為詳記
始末并贈以詩

曾為行脚此經行聚鐵依稀鑄姓名重向荒村投一宿
忽從古佛證前生斧斯荆棘還初地海湧樓臺現化成
用盡萬金殘債了結跏依舊聽鐘聲

伯牛岡在杞縣城東上有冉子廟地非孔道行
人罕有過而問者

垂鞭來問伯牛岡，田叟扶犁過我旁。
指點人烟最深處，一村新柳似鶯黃。

重至陳留縣齋與許不器話舊二首

小許移官去，回頭十四年。

乙亥秋許霜巖出宰茲邑邀余同來留此兩月

故人

今宦此古義，兩殷然種樹添新蔭。
開池得美泉，重來娛老眼光景勝從前。

不料衝煩邑衙齋，乃爾閒簿書神不滯。
交友性相關，却餽安余素居貧。
諒汝艱一杯渾暖熱，相顧慰衰顏。

是日大風

寒甚

大雪暮抵開封湯西崖前輩留飲學署二首

二月梁園雪春風特地寒行防街路滑到及酒升寬物色符清望交情稱冷官庭花經手植何惜借人看

一代文章伯中原桃李陰青春聊作伴白髮莫相侵與國培元氣於公識苦心人知讀書貴土價比黃金

徐大來太守送黃河水

汴俗多鹽井黃流遠不侵兩牛煩重載斛水抵兼金澹

泊知官味清涼鑒客心
飲河還自哂滿腹恐難禁

雪後發汴城

三日大梁住北風吹不休
朝來開霽景擬上渡河舟
此地多賢主吾生感舊遊
吹臺桃柳色臨老重回頭

渡黃河

地勢豁中州黃河掌上流
岼低沙易涸天遠樹全浮
梁宋回頭失徐淮極目收
身輕往來便自歎不如鷗

延津城北望太行山

河壩一小縣傳是廩延城野燒痕猶在沙田廢不耕民
謠思樂土客飯記荒程指點鹽車路千峰馬首晴

早過淇縣

高登橋下水湯湯朝涉河邊露氣涼

高登橋朝涉行過河皆在城南

淇園天未曉一痕殘月杏花香

渡淇水

昨日渡衛源今朝涉淇水出山雖異派相望不百里遊
子中原來黃流混混耳忽然鑿毛髮顧影落清泚風塵

有顰顏夫豈水污爾從衰旋得白正坐不知止逝者方
如斯於何觀止理寓形忌太潔外垢庶可洗

鄴下雜咏四首

湯陰城外千楊柳密罩征鞍過相州中有一株柔可愛
勸人繫馬拂人頭

一賦何當敵兩京也知土木費經營濁漳確是無情物
流盡繁華只此聲

頑礫粗礪少硯材詞人陳跡散如灰兩家搏土殊多事

曾範三臺舊瓦來

一月寒禁幾信風初從河北聽靈霞老夫準備看花眼

半日停鞭住鄴中

是日雷雨

雨後發豐樂鎮渡漳河

雷雨已過朝復暝早桃欲花烟滿村夢中似聞簷滴響
渡口微覺河流渾青山濛濛作雲氣白浪滾滾留沙痕
滏陽北望三十里舊事過眼從誰論

曩與許霜巖過此有芟荷香裊列磁

州之句

醜渠詩并序

磁州在漳溢二水間大興蔣侯來知州事始至相度地勢慨然思復西門豹史起之舊謀於州之士民咸慮勞且費侯獨違羣議毅然為之醜溢陽河為渠以灌城南北渠之廣不過一丈深半之曲折通流建閘以驗盈縮旱潦有備蓄洩以時行之十年開稻田數萬頃歲收數十萬斛初以為不便者後皆帖帖謂侯之惠愛斯人惟斷乃成也侯名擢字試可余未識其

人過其境聞父老之言有古循吏之風焉作詩以俟
采風者

一州頓復西門績南北醜流引滄河綠樹成陰茅屋少
清渠夾鏡稻田多年深漸欲孽魚蟹利美兼宜植芰荷
他日誰裁溝洫志吾詩或可當絃歌

題邯鄲呂仙祠壁

百念全消一老夫神仙不信信浮屠直饒贈枕成何用
鼻息如雷夢已無

臨洺關

臨洺關前春水綠
草色平鋪接沙麓
戍人閒雜老農耕
拾得前朝戰場鏃

自褙裋店騎驢至沙河

遙遙沙河城
晶晶堆均白驢
耳露雙尖驢蹄深一尺
鴉拾粒行

牛前仰而犁鴉後俛
以拾牛豈為鴉耕
鴉因牛得粒農
夫呵牛長苦饑
不如鴉羣飽食東西飛

渡泚水有感於張陳事

泚河直下常山郡誰遣當年竟不流此事終留交道恨
萬屍填塹兩人仇

上巳趙州道中二首

幾日水開合餘寒勒柳條

十日前中州已見杏花而邯鄲以北柳未全綠氣候之不

同此如水濱遊女少閒殺趙州橋

平原留故里牢落幾人家客過誰澆酒僧來且喫茶

與張昆詒

時宰新樂

惠好自兒童相看忽老翁以君三歲長與我兩心同書
畫性成癖絃歌聲可風桑榆須早計歸路免西東

定武道中

積雪春猶潦連朝釋凍痕鶯花何太晚榆柳不勝繁貫
酒中山市騎驢代北村祗愁風色惡回首太行昏

堯母泉在慶都城南源發于平地四時不涸環
城數十里間居民頗獲其利

禹貢遺風冀壤先帝鄉耕鑿故依然繞城半食蒲荷利

源在南鄉一眼泉

道旁石碑稱堯
母鄉第一泉

保陽城西望落翮山

不斷羊腸麓東來萬馬趨數峰銜落日北路出飛狐

狂風行

碧天杲杲日正中萬竅突發顛狂風塵沙瀚勃晝冥晦
瓦礫旋轉隨枯蓬使人口吻不得張耳目成盲聾馬牛
來往紛憧憧問之不辨西與東是時三月初柳條舒綠
桃將紅胡為噫此不平氣春行秋令毋乃違天公我行

邂逅偶相值墨守未易當輸攻心如混沌一不鑿外感
欲入何由通適來日無影適去塵無踪盡收衆籟入索
籥仍以一寂還虛空

清明前三日重直

暢春園觀桃花二首

煖烟晴靄互交加散作高低遠近霞行盡人間冰雪路
又來天上看穠華

已逢蛺蝶未聞鶯閏歲春遲倍有情畢竟鳳城花信準

早桃開候近清明

同年王樓村招飲白丁香花下

我從鄉園來不看鄉園花
輸君京洛佳久客還成家
一株丁香高卑趁檐牙
曾經上番種旋發春來葩
獨抱冰雪姿亭亭遠塵沙
良辰醉其下酒美殺核嘉
夕陽轉庭西人影花交加
我鬚已半白君鬢亦漸華
自然法眼淨維摩經遠離塵埃得法眼淨
不被紅紫遮為歡出邂逅
所戒非窮

賒

後漢仲長統傳論楚楚衣服戒在窮賒

閏三月朔與德尹同直內廷次東坡五月一日

轉對韻

冠歷華顛帶繞腰重來心跡負耕樵僦居未穩連宵夢
接武還同隻日朝上苑花開如見笑故人酒熟例相要
殘年果踐歸休約擊壤猶能頌

帝堯

苑東移居與同年汪紫滄同寓紫滄有詩和荅

三首

近傍名園遠去郊無多屋宇半編茅春蠶慣作同功繭
癸未以後借紫
滄下榻自怡園
社燕來尋舊識巢景與征衫隨日換官
隨手板幾時拋卜隣絕勝清漳宅蛩駟相依刺素交

茫茫人海此居停萬斛風埃兩葉萍草色堦除晴不掃
槐陰門扇晝長扃同槽廢馬無蹏啣典謁家僮互使令
怪底羣情皆帖妥多緣君與我忘形

西苑鶯花幾閱春憶初伴直只三人

暢春園向未有直
盧癸未正月三日

余與聲山紫滄始奉
召入直後遂為例
何堪夢覺傷存歿或恐詩成泣鬼

神時家聲山甫下世所居即其舊寓也炳燭餘光銷晚境青雲歧路失前

因搏沙放手終同散

東坡詩親友如搏沙放手旋復散

敢向蘧廬認主

賓

同年佟淵若學士遊西山歸出示見寄二絕句

次韻奉答

浮嵐暖翠望難分忽枉新篇贈白雲賴是愛山同有癖
夢為麋鹿也隨君

西山何似西湖好欲問知章借馬騎今日烟波重到眼

去年曾和卷中詩

去年春杪與淵若西湖唱和

題顧桓吳江送別圖為紀可亭學博賦

舟移碧草綠波岸人別曉風殘月時此景此圖誰會得
江郎賦筆柳郎詞

閏月十四日西苑送春二首

九十春光百五賒綠陰陰處雨斜斜多情裂帛湖頭水
長替東風掃落花

老去春遲願竟酬多添半月踏青遊人間何處無歸路

也被宮鶯喚少留

閏三月二十一日蒙

恩召入淵鑒齋乘舟至瑞景軒蕊珠院露華樓徧觀各
種牡丹恭紀四首

宣喚欣欣異數加
高從銀漢泛紅槎
行陪閬苑神仙侶
看徧春風穩重花
濃淡何心隨造化
丹青難貌是韶華

先一日傳示

牡丹圖譜

旃檀別殿分明到
只作華胥好夢誇

艷極真宜過雨看
枝頭肅肅尚朝寒
盤盃向背開瓊扇

瓔珞高低現寶鬢
白日光中雲五色
明波濯處錦千端
天工頃刻呈新瑞
點出靈砂九轉丹

萬卉千葩未覺稠
掃宮老監記牙籌
薌林不斷通三島
花海無邊際十洲
佳氣茵苙蒸作霧
餘霞縹緲結成樓
葦珠一本尤奇絕
徑尺重臺兩並頭

瑤階釳砌望迴環
映徹層層著色山

御譜新標題品外

花名凡九十餘種
皆皇上新定

佳名微別淺深間

心如草木春知閏
天並

君王霽在顏一片爐烟成百和袖中攜得國香還

寓庭槐

庭隅雙槐樹手植知何人自我來此居婆婆忽經春初
看兔目綻漸布綠葉勻高處稍出牆密將遮比隣以茲
尋丈地無窮寓清新千章豈不多取蔭及一身閱人如
傳舍脈脈還傷神

四月二日

恩賜櫻桃恭紀十韻

燦燦華林種離離朱實香熟常先夏果貢不待夾方磊

砢初垂樹勻圓正滿筐珊瑚駢火齊沈瀼和瓊漿露帶

枝頭潤盤登葉底涼烏鷓珠愛赤蜂釀蜜羞黃櫻桃一名櫻珠

一名昨憶西湖獻去歲初夏上駐蹕西湖居民日進此果今來上苑嘗賜

珍蒙見及飽食感非常配笋厨空勅探花宴屢張唐時宰相

有櫻笋厨進士有櫻桃宴分甘誰得似長侍

聖人旁

題孫書年松下清齋圖

孫善山水近亦供奉畫苑

自從月給官倉粟，辜負園中鴨脚葵。
思作散仙猶未得，更思成佛問何時。

西苑

賜觀秧田恭紀十二韻

帝籍非千畝，農祥視一畦。
初聞朱果熟，旋見綠針齊。
料節栽花地，開醜灌稻溪。
自

天知稼穡率土動，稷粳檻外雲生岫。
簾前雨作泥膏腴，隨廣狹脈絡就高低。
剡剡浮金淑蔥蔥，夾玉堤好風垂

柳下斜日畫橋西多稔占豐稔維魚兆畢圭甸師行不
到勾盾典曾稽入侶金鴈鵝歸尋木馱馱自慙輸布穀
猶解勸耕啼

四月二十七日

召入無逸齋看新竹恭紀十二韻

地闢琅玕鳴天通箭枯門烟霄連別苑雷雨過前軒
菽菽風開籜洄洄水注根移栽初尚淺培護久能繁
惜筍寧充饌抽梢盡出藩幾年成翠幙一徑轉蒼根
潤滴莓

苔砌高扶薜荔垣涼陰清有氣新粉淨無痕直節人皆
見虛心道亦存律堪調鳳吹名豈愧龍孫好報平安信
休辜長養

思親從天上看
不羨白沙村

題王麟昭桐陰撫琴畫扇

暑殘涼早雨餘天人坐桐窗晝寂然百尺清陰三尺水
秋聲先上七條絃

午日西苑直廬賦雨中榴花

小院盆榴樹花時帶雨鮮
施朱何太赤似火獨能然
白髮違佳節丹心感盛年
蒲葵方滿眼此本定誰憐

敬業堂詩集卷三十五